

Mál nr. 44/2012
M vegna bifreiðarinnar A og
Vátryggingafélagið V v. heimilistryggingar H

Skoteldur skemmdi bifreið þ. 31.12.2011

Gögn.

1. Málskot móttakið þ. 3.2.2012 ásamt fylgiskjali 1-2
2. Bréf V dags. 20.2.2012 ásamt fylgiskjali.

Málsatvik.

H var að skjóta skoteldi á gamlárskvöld. M segir að hann hafi skotið upp bátslaga áramótatertu á bílaplani en hinum megin í götunni hafi A bifreið M verið lagt. M segir að bílaplanið sem H notaði sem undirstöðu fyrir skoteldinn hafi verið þakið ís og snjó auk þess sem um halla hafi verið að ræða og þess vegna hafi skoteldurinn aldrei staðið á jafnsléttu. M segir að skoteldurinn hafi lagst á hliðina og hafi tæmt sig á A, sem varð fyrir skemmdun vegna þess. M gerir kröfu um bætur í heimilistryggingu H vegna þessa. V hafnar bótaskyldu og hefur eftir H að hann hafi sett skoteldinn á götuna fyrir utan innkeyrslu þess húss þar sem hann var gestkomandi og hafi skoteldurinn verið lagður ofan á harðan sléttan snjó sem hafi ekki hallað og A hafi staðið um 4 metra frá skotstaðnum. V telur það ekki gáleysi að kveikja í umræddum skoteldi sem um ræðir enda hafi H farið eftir leiðbeiningum á skoteldinum. Þá hafi H ekki getað brugðist við þegar skoteldurinn féll á hliðina og skotin lentu á A. V telur að um óhappatilvik hafi verið að ræða í umrætt sinn.

Álit.

Ekki er ágreiningur um það að A varð fyrir tjóni vegna þess að skot úr skoteldi sem H tendraði lentu á A. Eins og atvikum er lýst þá getur það ekki talist ásættanlegur frágangur á skoteldi að setja hann ofan á snjó jafnvel þó hann sé hallalaus og sléttur. Skoteldar eru hættulegir og það ber að ganga það vel frá þeim áður en þeir eru tendraðir að hvorki fólki né munum stafi hætta af. Þess gætti H ekki í umrætt sinn og ber því ábyrgð á því tjóni sem varð á A. M á því rétt á bótum úr heimilistryggingu H hjá V.

Niðurstaða.

M á rétt á bótum vegna tjóns á A úr heimilistryggingu H hjá V.

Reykjavík 6.3. 2012.

Rúnar Guðmundsson hdl.

Valgeir Pálsson hrl.

Jón Magnússon hrl.